


Toni Vukadin, gradski vijećnik

Sarajevo: 07.02.2023. godine



GRADSKO VIJEĆE GRADA SARAJEVA
PREDSJEDAVAJUĆI GRADSKOG VIJEĆA
Komisija za izbor i imenovanje

PREDMET: Prijedlog za dodjelu priznanja “Počasni građanin Grada Sarajeva

Poštovani,

U skladu sa odredbom člana 12. Odluke o priznanjima i nagradi Grada Sarajeva (“Službene novine Kantona Sarajevo”, br.34/10 – prečišćen tekst, 14/14, 31/14 i 11/20, podnosim

PRIJEDLOG

za dodjelu priznanja “Počasni građanin Grada Sarajeva”

MILAN MLADENOVIĆ – POSTHUMNO

OBRAZLOŽENJE

Milan Mladenović je arhetipska pojava na ex Yu rock sceni. Njegovo djelovanje je u velikoj mjeri obilježeno i borbom protiv narastajućeg primitivizma krajem osamdesetih i početkom devedesetih godina prošlog vijeka. Borio se za mladost koja je zenit doživjela pred početak mračnih ratnih godina.

O Milanovoj umjetničkoj i ljudskoj veličini svjedoče njegova djela i izjave iz ratnog perioda, međutim, skoro nepoznat je detalj da je Milan pjesmu “Crv” napisao nakon masakra na Markalama u Sarajevu.

Usred rata, kada su svi nijemo šutjeli, Milan je na dodjeli nagrade za grupu godine rekao “Nama je vrlo olakšano da osvojimo ovu nagradu, zbog toga što mnogi naši drugovi su morali da napuste ovu zemlju, a neki od njih ovog trenutka možda su živi a možda i nisu živi – u Sarajevu, Zagrebu, Dubrovniku, Rijeci” i pozvao na minute šutnje za žrtve stradanja u BiH i Hrvatskoj.

U vrijeme opsade Dubrovnika, Milan je pozvao publiku da minutom šutnje odaju počast bombardiranom Dubrovniku i njegovom stanovništvu. Međutim, neki iz gomile su glasno negodovali, a čuli su se čak i povici "uhapsite ga". Kada je s "Rimtutitukijem" tokom rata trebao gostovati u Banjoj Luci, Milan je iz protesta otkazao nastup zato što je eksplozivom srušena najstarija i najpoznatija banjalučka džamija Ferhadija iz 1579. godine.

Tri ulice u glavnim gradovima bivše Jugoslavije nose Mladenovićevo ime. Naime, jedna ulica u Zemun Polju je 2004. godine dobila ime Milana Mladenovića, a početkom decembra 2007. godine i u Zabjelu, predgrađu Podgorice te na kraju i u Zagrebu.

Osim ulica, gradski parlament Beograda je u maju 2011. godine potvrdio da plato ispred Doma omladine ponese ime Milana Mladenovića.

U novembru 2006. godine pjesma "Par godina za nas" izglasana je za najbolju pjesmu svih vremena na prostorima bivše SFRJ.

Mnogi se s tugom prisjećaju dana kada je ovaj veliki umjetnik i čovjek otišao u legendu, ali vjeru da će njegov duh živjeti vječno, daju nam nove generacije koje se tek upoznaju sa njegovom muzikom.

S poštovanjem,

PODNOŠILAC PRIJEDLOGA

Toni Vukadin